

氏族典第四百四十九卷

沈姓部列傳二

宋 沈倫

按宋史沈倫傳倫字順儀開封太康人周顯德初太祖領同州節度留幕府及受禪自宋州觀察推官召爲戶部郎中建隆三年遷給事中開寶六年拜中書侍郎平章事集賢殿大學士太平興國初加右僕射六年加開府儀同三司雍熙四年卒諡恭惠

沈承禮

按宋史吳越世家沈承禮湖州烏程人錢鏐辟置幕府鏐子元瓘以女妻之出爲台州刺史元瓘卒子佐嗣以承禮掌親兵俶襲位命知威武軍節度事充兩浙都鈐轄使王師征江南俶遣承禮率水陸數萬人助平毗陵因攻潤州丹陽平遂率兵抵建業李煜歸朝錄其功真授福州節制太平興國初俶盡獻浙右地徙承禮鎮密州八年卒

沈正

按宋史邢神留傳端拱初泰州海陵人沈正父使酒毆平人死正中塗見父恐懼卽號呼褫衣就毆其屍巡警者捕送官獄具怡然就死聞者悲之

沈繼宗

按宋史沈倫傳倫子繼宗字世卿倫爲樞密副使以廢補西頭供奉官倫作相授水部員外郎歷遷光祿少卿大中祥符五年卒子惟溫惟清惟恭並爲將作監主簿惟溫後至祕書丞惟清至內殿承制

沈播

按萬姓統譜播武康人天聖二年以進士起家楚州司法叅軍再調知池州貴池縣嘗攝銅陵縣事有兄弟爭財者爲辨其曲直而卒使之感悟讓財相與同居其去也兩縣人追送涕泣平居事嚴喪死哀終身好書未嘗一日不讀循道以守官而不諂其上故仕嘗有去志年三十六以疾卒於京師子四皆舉進士

沈邈

按宋史沈邈傳邈字子山信州弋陽人進士及第知候官縣累遷都官員外郎慶曆初爲侍御史論夏竦陰交內侍劉從愿其言甚切轉兵部員外郎使京東歲餘入爲侍御史知雜事未幾擢天章閣待制知潭州徙河北都轉運使又徙陝西知延州卒

沈遘

按宋史沈遘傳遘字文通錢塘人以廩爲郊社齋郎舉進士通判江寧府歸奏本治論除集賢校理遂知制誥以父扶坐事免求知杭州爲人疎雋博達明於吏治令行禁止召知開封府遷龍圖閣直學士士大夫交稱其能拜翰林學士判流內銓丁母憂歸蘇州旣葬廬墓下服未竟而卒

沈遘

按宋史沈遘傳遘弟遘字叡達用兄任監壽州酒稅熙寧初分審官建西院以爲主簿故受知於王安石安石當國遘與之議論浸拂意日益見疎於是罷去元豐末卒

沈括

按宋史沈括傳括字存中以父任爲沐陽主簿擢進士第爲館閣校勘遷太子中允提舉司

天監遷太常丞擢知制誥爲河北西路察訪使遼蕭禧來理河東黃鬼地遣括往聘契丹相楊益戒來就議凡六會不可奪還拜翰林學士出知延州以功加龍圖閣學士元祐初以光祿少卿分司居潤八年卒

沈立

按宋史沈立傳立字立之歷陽人舉進士提舉商胡埽采撫大河事迹古今利病爲書曰河防通議治河者悉守爲法遷兩浙轉運使召爲戶部判官遷京西北轉運使知滄州進右諫議大夫判都水監出爲江淮發運使知越州杭州審官西院江寧府徙宣州提舉崇禧觀卒

沈巖

按萬姓統譜巖字德寬德清縣人監洪州武寧茶場兼領縣事吏畏其廉民懷其愛及卒貧不能葬太守滕元發爲葬於德清之永和鄉

沈起

按宋史沈起傳起字興宗明州鄞人進士高第調滁州判官遷知海門縣包拯舉爲監察御史以論

興國鐵官事不合出通判越州改知蘄楚二州熙寧三年爲陝西都轉運使罷知江寧府入知吏部流內銓六年拜天章閣待制知桂州坐邊議貶團練使安置郢州徙秀而卒

沈初

按萬姓統譜初字子深無錫人熙寧六年進士文詞典麗時爭效之元祐尙詞賦朝廷嘗以沈初林希與詞賦頒天下爲格初賦後流至西夏夏人織爲文錦其稱賞如此官終國子直講

沈思

按尙友錄思字持正號東老湖州隱君子也隱於東林因號東老熙寧中呂仙到其家題詩云西鄰已富憂不足東老雖貧樂有餘白酒釀來緣好客黃金散盡爲收書

沈宣

按宋史沈宣傳宣汝州梁人母亡旣葬不塞墓門三十有六月晝負土夜拊棺而臥爲墳廣百尺妻高亦有孝行元豐中褒賜粟帛

沈銖

按宋史沈銖傳銖字子平真州揚子人進士高第至國子直講坐虞蕃事免歸紹聖初起爲太學博士崇政殿說書以龍圖閣待制知宣州卒

沈躬行

按萬姓統譜躬行字彬老吳興人遷瑞安自幼力學非義弗蹈從伊川程氏學篤信力行卓然以聖賢爲依歸後學矜式焉

沈錫

按宋史沈銖傳銖弟錫字子昭崇寧初爲講議司檢討除衛尉丞遷祠部員外郎提點江東刑獄知婺州入爲左司員外郎進太常少卿拜兵部侍郎以徽猷閣待制知應天府歷海泰汝宣四州致仕卒

沈畸

按宋史沈畸傳畸字德侔湖州德清人第進士崇寧中爲尚書議禮局編修官召對擢監察御史進殿中侍御史蔡京興蘇州錢獄株連死者甚衆帝遣畸至蘇卽日決釋無佐証者七百人京大怒削

畸三秩貶信州酒稅未幾卒子溶官至右正言

沈積中

按宋史沈積中傳積中常州人賜進士出身爲辟雍正戶部員外郎至祕閣修撰河北轉運使召拜戶部侍郎進尙書知河間真定府提舉上清寶籙宮卒

沈與求

按宋史沈與求傳與求字必先湖州德清人登政和五年進士第累遷至御史中丞與求知無不言前後幾四百奏其言切直移吏部尙書出爲荆湖南路安撫使知潭州引疾丐祠四年出知鎮江府復以吏部尙書召除參知政事金人將入寇與求贊上親征五年權知樞密院事時張浚視師江上以行府爲言從之與求不能平遂丐祠罷出知明州七年在平江召見從至建康遷知樞密院事薨諡忠敏

沈晦

按宋史沈晦傳晦字元用錢塘人翰林學士沈遵孫宣和間進士除校書郎金人攻汴京從肅王樞

出質還爲給事中高宗卽位除集英殿修撰知信州移守婺州尋知宣州移知建康府以御史常同論罷紹興四年起知鎮江府兩浙西路安撫使尋提舉臨安府洞霄宮起爲廣西經略召赴行在除知衢州改潭州提舉太平興國宮卒

沈莊可

按萬姓統譜莊可分宜人宣和間進士知錢塘縣事嗜菊庭植嘗數百本晚年退居益放情於菊後以九月九日死朱熹哭之詩曰愛菊平生不愛錢此君原是菊花仙正當地下修文日恰值人間落帽天生與唐詩同一脉死隨陶逕葬千年如今忍向西郊哭東野無兒真可憐

沈希稷

按萬姓統譜希稷字濟叔温州人宣和元年知龍泉三年睦賊洪載入寇諸邑皆陷民情洶洶希稷毅然爲守禦計賊至與戰大破之事平朝廷嘉其功增秩一等在邑五年去之日送者涕泣爲立三賢堂

按萬姓統譜周知泉州治尙簡易訟有可已者輒諭以義使歸思之獄以故少州舊多盜日暮市門盡閉禁民勿往來周至除其禁而盜亦止

沈時升

按萬姓統譜時升雪川人宣和末令慈谿誠心撫字愛民如子俗咸化之無敢梗政旣去父老請立祠於治內名沈公堂其子該爲丞相

沈杞

按萬姓統譜杞紹興初知廉州時本州科舉附雷州閔士子遠涉鯨波奏請自置科場詔從之由是士益奮志得人爲盛後立祠於學宮像而祀之

沈昭遠

按萬姓統譜昭遠紹興間知袁州初民輸義倉米倉吏違制倍斂昭遠力爲減其半時四邑歲以羨餘錢米上邑不下數十萬昭遠曰此非天降地出無非虐取於民盡卻之民皆感悅

沈大廉

按萬姓統譜大廉字元簡瑞安人登建炎第後爲樞密院詳議官紹興更化除監察御史遇事敢言無所顧望給事中周葵以封駁忤旨去職大廉既陳其不可俄而中書舍人凌景夏相繼去大廉復言之俱不報自以不得其言力求補外除直祕閣福建提刑一時公議翕然歸重越明年卒王十朋挽之曰能將一誠字了却百年身則其充拓所學者有素矣子季豐登科

沈瑄

按萬姓統譜瑄字汝律德清人仕爲燕山府提舉金人犯邊爲郭藥師所執不屈金人遣同李鄴赴闕議和瑄首陳虛實乞邀擊之不用著南歸經世二錄以攄忠憤

沈該

統萬姓統譜該字約文歸安人紹興間爲禮部侍郎出知夔府召還除叅知政事該邃於易嘗撰小傳六卷上之高宗降詔褒美刻石於其私第

沈樞

按萬姓統譜樞字持要安吉人舉進士調彭澤丞用葉義問薦賜對首論君子小人之辯高宗嘉之

除監察御史坐不附楊邦彥獲譴端州尋起温州

沈介

按萬姓統譜介字德和德清人累官兵部尙書爲荊湖制置使風采獨持金人潛却其爲郡卓有清聲豪猾斂迹

沈度

按尙友錄度字公雅爲餘干令父老以三善名其堂一曰田無廢土二曰市無游民三曰獄無宿繫

沈復

按萬姓統譜復字德之德清人舉進士乾道初爲太常簿賜對稱旨除宗正丞累遷至樞密院事所著有四益齋集真德秀嘗序其文謂其議論不少詘有古大臣之體

沈煥

按宋史沈煥傳煥字叔晦定海人乾道五年舉進士授餘姚尉召爲太學錄同僚忌其立異調高郵軍教授後知婺源三省類薦書以聞遂通判舒州閒居雖病猶不廢讀書拳拳然以母老爲念善類

涓零爲憂卒諡端憲

沈清臣

按萬姓統譜清臣字正卿鹽官人爲國子監錄有薦爲館職者執政不許晚乃召用以直諒稱初從張無垢學人或以禪學譏之清臣固自得也所著有晦巖集十二卷

沈虛中

按尙友錄虛中廣德人舉進士歷官吏部尙書所著有資治通鑑事類十卷左傳國語要略十卷考異三卷桐川集十卷

沈作賓

按宋史沈作賓傳作賓字賓王世爲吳興歸安人中刑法科歷江西提刑司檢法官入爲大理評事改秩通判紹興府秩滿知台州首訪民疾苦五十日間盡除前政之不便民者邦人胥悅而前守嫉其勝己巧媒藥之罷去慶元初歷官至權工部侍郎以言者罷歸起知鎮江府召爲戶部侍郎除江西安撫兼知隆興府在郡擲錢二十餘萬緡僚屬請獻諸朝作賓謂平生未嘗獻羨以半歸帥司牒

師半隸本府進顯謨閣學士致仕卒

沈木

按萬姓統譜木字子謙崇德人嘉定初進士知石城縣時汀寇入境牒熊子開等爲鄉導巡尉司以隅官姓同者指爲賊木察其非是破械與約使捕子開輩衆謂其縱虎已而果縛子開以獻人服其明繼倅建昌守郢所至有古循吏風

沈當

按萬姓統譜當字退夫德清人舉進士賜同三禮出身釋褐懷安軍司理參軍累遷至國子監丞

沈誥

按萬姓統譜誥字宜之德清人仕至刑部侍郎遷戶部尙書以敷文閣學士奉正龍祠終有東溪集二十卷行於世

沈炎

按宋史沈炎傳炎字若晦嘉興人寶慶二年進士調嵯縣主簿曆官侍御史景定元年拜右諫議大

古今圖書集成
夫同知樞密院事以資政殿學士提舉洞霄宮三年進大學士致仕卒

金 沈璋

按金史沈璋傳璋字之達奉聖州永興人也迪古乃軍至上谷璋與李師夔開門迎降授太常少卿遷鴻臚卿拜左諫議大夫知路州事移知忻州改同知太原尹加尙書禮部侍郎轉吏部爲東京路都轉運使改鎮西軍節度使致仕卒子宜中天德三年及第

元 沈拱辰

按浙江通志拱辰字國祥吳縣人至元丁丑尹安吉鋤強植弱姦豪屏迹事至立決吏民愛之

沈壽康

按萬姓統譜壽康字元懋海鹽人嘗爲州吏取祿養親親歿居喪葬祭情禮兼至廬於墓所敝衣菲食以終其身初壽康爲法家學至是乃日誦五經四書尋繹討論信道甚篤南臺御史嘗論薦欲官之辭不就

沈夢麟

按萬姓統譜夢麟字元昭歸安人勸學勵行年十七卽以詩名爲婺州學正遷武康尹所至有聲入元五司閩浙文衡一考會試人皆服其公卒年九十三所著有花溪集

沈貞

按萬姓統譜貞字元吉長興人元末隱居橫玉山中號茶山老人性介篤學博通經史尤長於詩安貧樂道特立獨行所著有茶山集十卷

明
沈鉉

按萬姓統譜鉉字鼎臣博學邃於春秋元末居嘉興教授生徒張士誠據平江屢徵不屈洪武初召修禮書授太常博士尋以母老辭歸復徵至京卒所著有希賢集

沈秩

按明外史趙秩傳洪武三年遣使招諭海外諸國沈秩字仲庸烏城人以福建行省都事使渤泥既至其王馬合謨沙偃坐不爲禮秩折之乃率官屬受詔如禮秩遂以其使至

沈潛

按明外史唐鐸傳沈潛字尙賢錢塘人由洪武十八年進士授工部屯田主事以明敏稱二十年命試兵部侍郎進尙書後以事免

沈德四

按明外史沈德四傳德四華亭人祖母疾刲股肉療之愈已而祖父疾又刲肝作湯進之亦愈洪武二十六年被旌尋授太常贊禮郎又有上元姚金玉昌平王德兒亦以刲肝愈母疾與德四同時被旌

沈澄

按萬姓統譜澄字孟淵長洲人洪武中以徵命入將授以官見其舉止迂緩曰腐儒罷之周忱撫吳時數訪以時政澄長於詩又善交際士之爲詩者多就之澄爲飲食飯客未辦終不嘗食金間方繫都司納橐餽之饋凡十年無所怠問後得釋曰微孟淵餒死矣年幾九十子曰貞吉恆吉以詩世其家而履峻高善圖象學神仙方不就皆年至九十

沈德